

Samþykkt fyrir hverfisráð Sveitarfélagsins Árborgar

Umboð

1. gr.

Hverfisráð starfa í umboði bæjarráðs Sveitarfélagsins Árborgar með þeim hætti sem nánar er kveðið á í samþykkt þessari og eftir því sem samþykkt um stjórn og fundarsköp Sveitarfélagsins Árborgar og sveitarstjórnarlög mæla fyrir um.

Hverfisráð Sveitarfélagsins Árborgar skulu vera fjögur talsins og starfa á Selfossi, Eyrarbakka, Stokkseyri og í Sandvíkurhreppi.

Verksvið og markmið

2. gr.

Markmið hverfisráða eru eftirfarandi:

- Að vera formlegur umræðuvettvangur um hagsmunamál og þjónustu sveitarfélagsins fyrir viðkomandi hverfi.
- Að vera vettvangur hverfisins fyrir samráð íbúa, félagasamtaka og atvinnulífs við bæjarstjórn.
- Að vera vettvangur fyrir íbúa viðkomandi hverfis til að vera virkir þátttakendur í allri stefnumörkun Sveitarfélagsins Árborgar innan viðkomandi hverfis.
- Að gera tillögur til bæjarráðs um starfsemi og þjónustu innan viðkomandi hverfis.
- Að stuðla að hvers konar samstarfi innan hverfis.
- Að vera ráðgefandi fyrir stjórnslu sveitarfélagsins og stuðla að eflingu félagsauðs í sínum hverfum.
- Að tengja stjórnkerfi sveitarfélagsins betur íbúum þess og nýta þekkingu þeirra á sínu nánasta umhverfi.

Hverfisráð fá til kynningar nýjar aðal- og deiliskipulagsáætlanir í viðkomandi hverfi áður en þær eru auglýstar til umsagnar. Þannig hafa ráðin tækifæri til að koma á framfæri afstöðu til endanlegrar útgáfu skipulagstillögunnar áður en hún fer í almennt umsagnarferli.

Einnig skal leitast við að fá umsögn hverfisráða um stærri framkvæmdir og meginbreytingu á þjónustu á þeirra starfssvæði áður en endanlegar ákvarðanir eru teknar þar um í bæjarstjórn. Gangi það ekki eftir skal ákvörðun um stærri framkvæmdir og meginbreytingar á þjónustu send hverfisráðum.

Skipan

3. gr.

Hverfisiráð eru skipuð fimm fulltrúum kosnum af bæjarstjórn og tveimur varamönnum. Bæjarstjórnarmenn eru ekki kjörgengir í hverfisiráð.

Bæjarstjórn kýs formann úr hópi kjörinna hverfisiráðsmanna. Hverfisiráð skipta að öðru leyti með sér verkum. Kjörtímabil hverfisiráða er tvö ár.

Að auki skipar bæjarstjórn tvo bæjarfulltrúa til setu á fundum hvers hverfisiráðs og hafa þeir þar málfrelsi, en ekki tillögu- eða atkvæðisrétt. Hlutverk þeirra er að vera til ráðgjafar og veita upplýsingar um þau mál sem til umfjöllunar eru á fundum hverfisiráðanna og snerta viðkomandi hverfi.

Varamenn hafa, ef þeir óska þess, rétt til setu á fundum hverfisiráða með málfrelsi.

Verkstjórn og verkaskipting

4. gr.

Formenn hverfisiráða eru í forsvari fyrir þau um stefnumótun og ákvarðanir þeirra eftir því sem við á.

Bæjarráð ber ábyrgð á rekstrarkostnaði og framkvæmd ákvarðana hverfisiráðanna. Hverfisiráð gera bæjarráði grein fyrir áætluðum rekstrarkostnaði næsta almanaksárs fyrir lok september ár hvert. Hverfisiráð geta ekki stofnað til útgjalda eða skuldbindinga nema með samþykki bæjarráðs.

Boðun funda og fundarsköp

5. gr.

Formaður hverfisiráðs boðar til funda, ákveður dagskrá og stýrir fundum ráðsins. Á dagskrá skulu m.a. tekin mál, sem fulltrúar í ráðinu hafa óskað eftir að tekin verði þar fyrir, enda séu þau á verksviði ráðsins og þau mál sem bæjarráð/stjórnkerfi sveitarfélagsins hefur sent hverfisiráði til umfjöllunar. Fundir skulu boðaðir með a.m.k. tveggja sólarhringa fyrirvara og skal dagskrá fylgja fundarboði.

Hverfisiráð halda að jafnaði fjóra fundi á ári. Aukafundi skal halda eftir þörfum að ákvörðun formanns eða ef a.m.k. tveir nefndarmenn óska þess.

Heimilt er að taka mál til meðferðar í ráðinu þótt ekki sé það tilgreint á útsendri dagskrá en skylt er þá að fresta afgreiðslu þess til næsta fundar, sé þess óskað. Um fundarsköp fer eftir samþykkt um stjórn og fundarsköp Sveitarfélagsins Árborgar eftir því sem við á.

Hverfisiráð hafa fundaraðstöðu í húsnæði sveitarfélagsins í hverju hverfi fyrir sig, þar sem það er fyrir hendi. Þar sem svo háttar ekki til, útvegar sveitarfélagið fundarstað.

Fundaskipulag og ritun fundargerða

6. gr.

Fundir hverfisráða skulu alla jafna haldnir fyrir luktum dyrum og er óheimilt að greina frá ummælum einstakra fundarmanna á fundum þeirra. Hverfisráðum er þó heimilt að hafa fundi sína opna fyrir íbúum viðkomandi hverfis. Skal þá gera ráð fyrir sérstökum dagskrárlið: Fyrirspurnir og athugasemdir frá íbúum. Fyrirspurnir og athugasemdir má senda hverfisráðinu fyrir fram eða bera fram á fundinum. Hverfisráð skal halda að lágmarki einn opinn íbúafund á ári og auglýsa hann sérstaklega.

Hverfisráð skulu skrá fundargerðir og senda afrit fundargerða til bæjarráðs jafnóðum. Formaður sér um að fundargerðir séu skipulega færðar í tölvu og að allar samþykktir séu bókaðar nákvæmlega.

Fundargerðirnar eru teknar fyrir á fundum bæjarráðs sem vísar erindum sem fram koma í fundargerðum ráðanna áfram til viðkomandi sviða, deilda eða nefnda í stjórnsýslu sveitarfélagsins eftir því sem tilefni eru til. Erindunum ber að svara með bréfi eða tölvupósti.

Tengiliður hverfisráða við stjórnsýslu sveitarfélagsins er bæjarritari Sveitarfélagsins Árborgar. Hann sér um að aðstoða ráðin við upplýsingaöflun úr stjórnkerfi sveitarfélagsins og að upplýsa hverfisráðin um afgreiðslu nefnda sveitarfélagsins og bæjarstjórnar.

Bæjarritari sér einnig um að koma fundargerðum hverfisráða á dagskrá bæjarráðs.

Gildistaka

7. gr.

Samþykkt þessi tekur þegar gildi.

Samþykkt í bæjarstjórn Sveitarfélagsins Árborgar 15. maí 2019